

請賓頭盧經

宋 三 藏 慧 簡 譯

天竺國有優婆塞國王長者共設一切會常請賓頭盧頗羅墮誓阿羅漢賓頭盧者字也頗羅墮誓者姓也其人爲樹提長者現神足故佛擯之不聽涅槃勅令爲末法四部衆作福田請時於靜處燒香禮拜向天竺摩犁山至心稱名言大德賓頭盧頗羅墮誓受佛教勅爲末法人作福田願受我請於此處食若新作屋舍亦應請之言願受我請於此舍牀敷上宿若普請衆僧洗浴時應請之言願受我請於此洗浴及未明前具香湯淨水澡豆楊枝香油調適冷暖如人浴法開戶請入然後閉戶如人浴訖頃衆僧乃入凡會食洗浴要須一切請僧至心求解脫不疑不昧信心

清淨然後可屈近世有長者聞說賓頭盧阿羅漢受佛教勅爲末法作福田即如法施設大會至心請賓頭盧毘毘下徧布華欲以驗之大衆食訖發毘毘華皆萎懊惱自責不知過所從來更復精竭審問法師重設大會如前華亦復萎復更傾竭盡家財產復作大會猶亦如前懊惱自責更請百餘法師求請所失懺謝罪過始向上座一人年老四布悔其愆咎上座告之汝三會請我我皆受請汝自使奴門中見遮以我年老衣服弊壞謂是被擯隸滯沙門不宜見前我以汝請欲強入汝奴以杖打我頭破額右角瘡是第二會亦來復不見前我又欲強入復打我頭額中瘡是第三會亦來如前被打額左角瘡是皆汝自爲之何所懊惱言已不現長者乃知是賓頭

盧自爾已來諸人請福皆不敢復遮門若得
賓頭盧其座華即不萎若新立房舍牀榻欲
請賓頭盧時皆當香湯灑地燃香油燈新牀
新褥奮綿敷之以白練覆綿上初夜如法請
之閉房慎勿輕慢闕看皆各至心信其必來
精誠感徹無不至也來則褥上現有卧處浴
室亦現用湯水處受大會請時或在上座或
在中座或在下座現作隨處僧形人求其異
終不可得去後見座華不萎乃知之也
請賓頭盧經